


Tertib Surah	Nama Surah	Bilangan Ayat	Bilangan Ruku'	Makkiyyah / Madaniyyah	Tertib Turun	Bilangan Paragraf
Ke-105	Al-Fiil	5	1	Makkiyyah	Ke-19	2



Zaman Diturunkan

Surah al-Fiil besar sekali kemungkinannya diturunkan pada peringkat kedua kehidupan Rasulullah di Mekah selepas da'wah secara terbuka dilancarkan sekitar tahun ke-4 Kenabian. Ayat tanya **أَلَمْ تَرَ** bererti satu peringatan kepada orang-orang Quraisy dan satu seruan kepada mereka supaya berfikir dan merenung.

Perkaitan Surah Al-Fiil Dengan Surah Sebelum Dan Selepasnya

1. Di dalam Surah al-Humazah sebelum ini telah disebutkan tentang pemimpin Quraisy yang buruk akhlaknya dan sangat bakhil, di dalam Surah al-Fiil ini pula penjaga-penjaga Ka'bah dari kalangan pemimpin-pemimpin Quraisy Mekah diingatkan bahawa mereka telah lupa maksud sebenar pembinaan Ka'bah sehingga mereka telah memenuhkan dan mengotorkannya dengan berhala-berhala, sedangkan rumah itu dijamin Allah untuk menjaganya baik pada ketika pembinaannya dan setelah ia siap dibina.
2. Di dalam Surah Quraisy selepas ini orang-orang Quraisy diperintah supaya mereka menyembah hanya tuhan punya Ka'bah yang Esa **فَلْيَعْبُدُوا رَبَّ هَذَا الْبَيْتِ**.

Beberapa Kata Kunci Dan Tema Utama Surah

1. **أَبَابِيل** berkumpul, berkelompok-kelompok, berbondong-bondong. Ia adalah isim jama' yang tidak ada mufradnya.
2. **عَصَف** daun-daun tanaman, jerami untuk binatang-binatang ternakan atau kulit buah-buahan.
3. Kira-kira 50 atau 55 hari sebelum kelahiran Rasulullah s.a.w. seorang pemerintah Yaman beragama Kristian yang bernama Abrahah telah membawa pasukan tentera seramai 60,000 orang untuk menceroboh dan merobohkan Ka'bah. Mereka datang dengan menaiki gajah. Peristiwa itu berlaku sekitar bulan Februari tahun 571 Masihi. Pasukan tentera yang dipimpin Abrahah telah ditimpakan azab setelah mereka sampai di Muhassar (**مُحَسَّر**) dekat Wadi Muhasshab (**وَادِي مُحَصَّب**). Tempat itu terletak di antara Muzdalifah dan Mina. Abrahah dan pasukan tenteranya dibinasakan dengan burung-burung yang membawa dan melepaskan batu-batu yang berbisa ke atas mereka.